

四庫全書

集部

欽定四庫全書

集部

石倉歷代詩選卷四百

二十八至
三十一

詳校官編修臣謝振定

侍讀臣孫球覆勘

總校官進士臣朱鈐

校對官中書臣汪學金

謄錄監生臣薛登瀛

欽定四庫全書

石倉歷代詩選卷四百二十八

明 曹學佺 編

明詩次集六十二

楊守正

送王原常用其畱別詩句為題

渺渺孤飛雲悠悠大行道望望天一方惻惻傷中抱雲
兮本無心聚散秋空杳明發懷二人觸目離情攪瞻雲

想親舍萬里青山遠不覩山中人祇見雲中鳥鳥飛雲
與還花落重門曉悵然歌式微別離何草草寄言綰雲
卿莫戀白雲好蒼生望為霖從龍興枯槁

右白雲時在目

西北有高樓逶迤上千仞迴瀾俯綠水阿閣凌青雲中
有絃歌曲知者識其真自云良家子選擇趨嚴宸佩玉
曳羅裳欲以克下陳朱顏俗不薄燕趙多美人無鹽逐
鄉里毛施亦逡巡容華恐消歇撫心一以矚明德苟不

虧燕婉終相親芙蓉湛秋水桃李熙陽春隨時愛容輝
無為長苦辛贈君金琅玕報我青玉盤

右壁水日論心

馥馥春蘭姿皎皎秋月輝流光照我懷馨香襲我衣遊
子惜日暮行人懷路歧對酒未成醉攬衣重徘徊孤獸
不遑食離鴻亦鳴悲感之復嘆息益抱離羣思四海皆
兄弟白首誰相知斷金良不易麗澤一以資胡為遠離
別各在天一涯南陔有真樂伐木多苦辭懷哉復來斯

三歲以為期

右分歧思不禁

耕樂

幽居遠城市遠屋皆良疇方春土膏動夜半催飯牛父
從原上耕子向田中耰豚蹄祀田祖甌窶欣滿篝先期
了公稅牀頭熟新芻陶然一醉間寧知公與侯

送孔潤伯歸樂清

朱明在赫曦端居困炎暑行子何匆匆移舟潞河許策

馬送之行寧辭汗如雨飲之碧筒盃酌以黃封醕情至
發長吟擊節飛雲駐親朋終日行眷戀寧如許愛人憐
屋烏思人及棠樹珍重宣尼孫典刑獨可睹去矣不可
留臨風重延佇

賦得洞庭湖送侯公矩金憲

我聞洞庭湖遠在巴陵道含山復吞谷洪波際天杪古
來題詠人無如杜陵老朝陽一鳳鳴千古喑百鳥如彼
黃鶴樓題詠有崔顥才如李謫仙有景不復道吾才非

謫仙少陵先壓倒况未臨此湖狂吟何草草所志不在
詩因之寄懷抱願君胸次間與湖同大小百川盡傾輸
萬象皆明瞭秋濤動山岳春波潤枯槁浩氣蒸作雲為
霖施八表

陳方伯邀觀惠山泉

古廟三賢在方塘一鑑開水流螭吻出源發驚峰來樹
影波心見茶香雲外栽竹爐有風味醒却紫霞杯

王儀賓第賞菊

王晉卿家菊滿籬我來猶見傲霜枝清芬只合秋蘭並
冷艷寧教睡蝶知已過重陽還對酒為憐晚節更題詩
回看桃李東牆外不及春風二月時

送人赴南京督府

驛路霜風落葉深馬蹄南去正駸駸欲從虎帳提金印
已向龍墀聽玉音千里舊都兵衛足百年昌運羽書沈
青油幕下應無事綠水紅蕖對客吟

送某通判

春秋經學舊知名早向薇垣聽鹿鳴齊國幾年操瑟立
吳門今日副車行羅浮山上雲連海楊子江頭月滿城
萬里修程初展驥好將膏澤潤蒼生

送蔣容知州

潞河更鼓正分明可柰風箏別調聲百鍊誰能為繞指
一麾聊復得專城雲連劍閣凌空峭月照潼江徹底清
莫道遐方淹驥足金閨仙籍待通名

和武靖侯趙公賞花詩

宿霧初收雨過簷侯門池館綠陰添波間香餌金鱗出
葉下鷗竿翠羽黏謾遣易牙調異饌不教扶朗識生鹽
酒闌夜色清如水露滴松梢濕老髯

次韻寄丹陵尹陳明達

令尹書檄手自開猶談祖席勸深盃喜聞惠澤覃花縣
羸得芳聲到栢臺比屋絃歌明月裏數村耕稼白雲隈
會看驥足亨衢展久識君非百里才

初署院印

金匱山房集卷二十八
霞明禁苑日初升遙望龍墀虎拜興職業乍紆方寸印
官銜仍是一條冰槐廳吏散清陰合柳院鶯啼淑氣蒸
文武衣冠多舊識賀門懽宴酒如澠

閒居漫興

公署抽毫每隔旬私居終日樂門身滿床黃卷為師友
排闥青山作主賓一任漫天風絮亂祇憐匝地雨苔新
日高卧聽鶯聲巧不喚鷄鳴待漏人

歲餘感懷

鶯花三月到南州，冰雪相看一歲週。
天上故人多特達，周南太史尚淹留。
海桑世事忙中變，水竹幽居夢裏遊。
最憶去年當此夜，弟兄相與醉新篋。

送于國用編修養病歸

清朝賢俊共彈冠，抱病憐君獨解官。
聖主恩深蒙賜告，故人情厚勸加飧。
蘄陽易得三年艾，楚澤還滋九畹蘭。
征鴈飛飛南又北，憑傳尺素報平安。

送董啟之進士

栢府先翁教一經長楊賦就獻明庭
皇華輶傳過親舍
楚國宗藩望使星
萬里雲程初發軔
三湘秋水試揚舲
殷勤相贈無他語
記取金人背上銘

寄從子茂元

我懷猶子在長沙
天北天南各一涯
為問同年外臺使
不知何處郡丞衙
竹林風月閒來久
湘水雲煙望轉賒
聖主恩深漢文帝
賜環仍與陟清華

清士

錫茶壺也

容儀脩飾色通明出處曾占旣濟亨玉乳先春資吐納
眞鉛伏火抱澄泓襟懷傾倒盧仝碗風韻和鳴子晉笙
若遇提撕從鼎鼐也輸涓滴潤蒼生

和儒

錫湯鼈也

自少相從安樂窩冬無爐火奈伊何能將蟹眼湯吞盡
不怕龍鬚席冷多身在提撕明似拭口當輸寫氣猶和
寒宵得汝常安寢一任人嘲春夢婆

送范吉太守

宣城太守出風塵盡道玄暉有後身紫禁鶯花聞奏語
黃童竹馬待回輪相逢盡話滄洲趣樂事猶懷泗水春
重念河汾六經在薛收曾是受詩人

與楊廷俊同齋

同官同姓又同階同作宮寮共宿齋四壁寒聲風刮戶
一簾清影月侵階奚童秉炬燒香篆侍史收衣護祭牌
坐久話關心似水塵氛無路入襟懷

長至日界首阻風

雲帆遙逐雁南征，屈指三旬計客程。
路入淮揚兩州界，時逢天地一陽生。
石尤風氣連雲黑，甌社湖光入夜明。
還憶往年當此日，滿襟風雪上陵行。

次韻酬翰長馬良佐

東出長安第一衙，地分佳麗職清華。
晨催玉漏猶高枕，夜對金蓮不草麻。
紫殿當頭迴日月，青山排闥送雲霞。
神仙洞府斯為上，我亦曾遊坐判花。

釋奠卽事有感

垂世功高在六經
祠官八佾舞于庭
致齋三日從先甲
祀典千秋屬上丁
祝版名書皇帝遣
麗牲碑勒史臣銘
何時義采遵堯錄
帝號加封假魯靈

到家喜入新第

曾將奏䟽入金鑾
勅賜園廛廿畝寬
苟合苟完成此室
爰居爰處詠斯干
墻梅蓓蕾含春意
庭栢森嚴耐歲寒
欲作休休亭自逸
君恩未報敢求安

拜湖後張四舅墓

湖後山前度石橋斧堂三尺衆峰朝行經霧靄迷榛莽
拜起嵐光動樹標假館曾聞庭下訓知音先識爨中焦
今朝一掬羊曇淚灑向東風濕柳條

飲大理家兄宅時駕部弟秋官姪及君美御史
時升府丞兩婿皆在席醉吟一首

幾年離索重相逢笑語哄堂意氣濃薛氏弟兄三附鳳
桓家女婿兩乘龍竹林更有青雲器棘寺新開綠蟻封
家慶合懽蒙帝德勉圖勲業佐時雍

吳原博少宰舊有別業其從子為構二亭其間
舊業吳門今復脩重開小築近西疇不同往日園棋墅
已辦歸時命駕遊謝傳賞心嘉玉樹杜陵高興付滄洲
為霖更望龍頭在未許安排范蠡舟

臘月十一日奉天殿進書

紫宸班列曉鐘初拜進細編上玉除禹貢九州經制法
周官六典太平書重瞳日月垂明鑒三殿雲霞映卷舒
文武憲章應有在致君堯舜復何如

甲子元日

去年金闕候朝參今日瞻印北斗南新喜歲華逢甲子
早傳家事付丁男遮賢幾許六旬九祝聖惟呼萬歲三
厚祿素飧無以報伐檀歌誦不勝慙

詔晉陞吏部尚書致仕

禮年登七合投簪況復衰顏病已侵再疏陳情歸待報
九重恩命愧難任崇階進躡尚書履厚蓄何須季子金
林下清風貧亦樂不忘憂國老臣心

遊東湖普恩霞嶼諸寺

東遊如入輞川圖
野鳥沙禽共喚呼
碧樹森羅三寶地
青山環繞萬金湖
人逢首夏衣穿葛
節近端陽酒泛蒲
一宿招提捫薜壁
達摩還面九年無

到福州城奉和家人韻

閩越南來第一州
城中三島列仙遊
諸番珍舶來重譯
萬頃塗田種兩收
榕巷書聲燈火夜
蓼汀漁唱棹歌秋
道山亭在煙霞裏
未得登臨最上頭

應制西山勝剎

四海昇平百度新
西山諸剎倚青旻
煙霞棧道通仙境
金碧樓臺隔世塵
萬壑松風和梵唄
千門蘿月照禪身
旃檀滿殿爐煙裊
祝我皇圖億萬春

朝陵次學士家兄韻

譙門曙漏咽銅龍
天上祥雲捧日重
廿里馳驅經輦道
萬山環遶護堂封
黃金臺殿東西列
白玉輿梁遠近重
欲向橋陵追杜老
難將瓦缶敵黃鐘

壽史母一百一歲

峩峩珠翟翠雲稠堂北高居壽最優
大衍再周重掛一平壺百刻又添籌
賢孫及第傳金帖令子懸車尚白頭
屈指古今能有幾題詩更祝八千秋

賦得震澤晴波送人入閩

五湖秋水客南還極目空明豁醉顏
素練平鋪雲夢澤青螺半出洞庭山
幾行鴈影孤帆外萬里天光一鑑間
南望八閩何處是歸心先到鄉關

別墅

塵市西頭別有天
芋區桃園近相連
繞城春水魚浮沼
負郭秋風鶴在山
書幔影飄荷葉外
酒壚香入稻花邊
主人高步瀛洲上
猶自哦詩憶輞川

送胡僉憲克敬

大河南北路東西
來往褰帷路不迷
華渚流虹身入覲
池塘春草句留題
觀風又返輶車驚
帶月應聞野店鷄
袞袞外臺登內省
喬遷有待築沙堤

竹茶鑪次吳原博諭德韻

渭濱蒼翠隔雲泉誰取編排事茗煎鳳閣舍人工創物
秋靈公子巧模前火紅松葉湯初沸月白桃花客未眠
飲罷雪香三弄笛閒中清趣自天全

林木養高

平生林下擁臯比笑看鷄雛集鳳池錦詠已承明主賜
雲山還繫故園思鴻飛碧漢凌塵坐鶴向青田啄玉芝
老眼靜看人世事夕陽亭外幾枰碁

陽穀道中清明

昨夜東風急雨聲
曉逢佳節是清明
篷窓春色柳枝掛
茶竈新煙榆火生
彩索鞦韆花外穩
畫船簫鼓月中鳴
因思往歲朝陵後
兄弟賡酬百韻成

孝陵恭謁有述

淮海龍飛入建康
金戈鐵馬淨櫓槍
不階尺土興如漢
盡革夷風治過唐
三紀衮衣明日月
萬年陵寢肅風霜
小臣瞻拜祠宮外
惟見參天樹色蒼

視篆後二日得學子

日出東城啼乳鳥
簷前乾鵲又相呼
判花公署方投筆
坐草私門又掛弧
自笑秋瓜生並蒂
休嘲老蚌出雙珠
多男且得寬懷抱
未計將來賢與愚

邵伯湖口與質夫文啓小酌

蘭棹翩翩先後行
夜來相失苦相縈
石尤風似知人意
甃社湖邊阻客程
雲抹青山螺黛碧
天涵白浪雪花明
蓬窓對景堪同樂
況有金陵酒滿罍

德州王知州璉韓同知璉各招宴于園亭

州衙深靚絕氛埃客至園亭次第開
兩院樹陰當晝合隔牆鶯語送春來
小橋幽徑翻紅葉曲澗鳴泉漾綠苔
別駕行觴懽未畢還從太守醉霞杯

退直有懷寄董德初太守

賜環簪筆侍明君待漏趨朝對夕照
未有尺書能寄遠謾思尊酒共論文
吟看雁影橫秋色坐對燈花落夜分
不識滇南賢太守也曾相憶賦停雲

宿都憲五兄第中

冀北頻年憶廣西
陟岡遙望暮雲低
壺公縮地知無術
靈運登雲喜有梯
憲府冰霜全晚節
夜牀風雨詠新題
清燈坐久談文運
五緯何時再聚奎

鈍儒

凍筆

章臺穎脫出羣倫
日染龍香劑潤身
涉署水衙頭欲禿
題封山啓蹟還新
中心正直摹猶壯
小字模糊大轉神
莫話秦人少恩事
不遺黎老詠皇仁

芳童

石香筒

何物寧馨辟稻粱雲根稚子有剛腸香分嫫氏雲中線
煙散圖澄掌上光藜火明銷天祿閣荀龍涎噴德星堂
佛書謾說嚴童子非木非空聞妙香

高叟

紙帳

楮生平素懶談玄學董垂帷到暮年午蝶有時同寤寐
秋蚊無路得黃緣虛中惟見室生白覆下何愁屋有天
自卜吾衰猶未甚周公時夢到君邊

焙師 焙籠

年來折節出巖阿
滅裂抽思作用多
千眼法王空相在
九還仙子內丹多
親闌不待身溫被
齋室寧容汗浥羅
雪夜梅天尤藉汝
祛除寒濕養天和

美稚 資果盒

縹綠兩兒皆好酒
鄒陽潘岳賦中看
却憐今日諸童子
只侑先春小鳳團
白面總如冠玉美
清標恍出壑氷寒
交梨火棗從何得
披腹呈來不用盤

爽客
葵扇

九光佛眩兩街僧六角金從五字增幾葉
柝欄人易忽
一逢安石價須騰輕翻香袖風生席獨映
齊紈月似冰
紗帽閒眠對鷗客不須庸汝卻炎蒸

次韻寄姪茂仁郎中

南國移居有竹衙平安消息報京華
傍籬已見新生笋
穿徑還侵舊種麻每對此君思小阮
無由縮地與陵霞
重懷文懿歸遊處啼鳥驚心淚濺花

送大司寇戴公祭掃榮歸

去歲乞歸歸未成今年報政又陳情尚書展墓原無例
聖主加恩許暫行日月祥光輝畫錦江湖秋色渺雲程
饒陽山上焚黃處草木欣欣也向榮

得請喜復原韻

去歲蜩鳴入覲來今年鶯囀出金臺四時有序成功退
六十猶癡了事回鐘阜曉山青抹黛秦淮春水綠於苔
濯纓還向江東去免得風吹撲面埃

吾鄞龍古朱氏予先祖侍郎府君之姻族也守
耻弱冠時嘗館于其家表姪名軒者年纔十
三從受業焉今來南都鬚鬢蒼然問其年已
六十二賦此志別

鷺脰湖堤挾兩川形如龍舌尚蜿蜒故家喬木千餘尺
先祖華姻上百年猶記小窗燈火夜研窮大易後先天
垂髫弟子今華髮話舊南都一慨然

畫山水為費廷言司業題

一幅驚溪絹縱橫數尺寬良工先潑墨妙手旋施丹物
象羅胸次天機到筆端宏開千頃澤寬出萬層巒遠近
濃還淡高低險復安遙岑蒼黛蹙列岫劍峯攢濯秀森
琪樹飛空下玉湍煙霞俱帶潤林壑似生寒幾處重重
屋誰家曲曲欄空青排闥入澄碧捲簾看紅葉危將墮
蒼苔濕未乾雲中無犬吠潭底有龍蟠潦盡沙礪路峰
回石磴盤小橋通別墅輕棹度前灘觸目皆佳景游心
恣大觀擬尋靈運屐猶戴貢生冠玩物情休蕩匡時志

欲彈何當畫無逸持以獻金鑾

應制蒼苔

禁苑初收宿雨天
玉沙馳道碧苔鮮
春來自是稀遊幸
一任飛花點翠錢

題朱太守山水畫雪夜景

山雪初晴月蘸川
乾坤一色浩無邊
不應清景無人見
繫岸初回訪戴船

園亭家晏次大兄韻

風吹香徑晚菲菲落盡紅芳蝶過稀却是蔓青花獨秀
春深猶解駐晴暉

送甫田尹周用中

與君舊友結新鄰京國相過分外親鳬舄南飛留不住
嚶嚶啼鳥薊門春

題蘭竹圖

深谷香風泛紫蘭雲根斜倚碧琅玕若為畫化黃金色
應是西山返照看

初予未得碧川集時但于四明文獻中拾其數篇而
已頃晤古田大令德周即公之玄孫也始以全集見
遺詩凡八卷共若干篇予不量敬來其尤者百許篇
在明集中亦稱取精之多者矣當成弘時人文為盛
而公家為尤盛昆季三登八座文懿啟于前公與康
簡賡之一時羣從登朝者六人公譽望尤著而歿後
易名之典至今闕焉蓋公視篆翰林時適遇朝廷一
日間陞傳奉官四十員科道上章因下詔獄六十員

言路一空公移書當軸謂當極力申救不宜作缺更
補語甚切直而當軸者不能從吳門沈啟南為作詩
以侈其事始大忿恚陰構之于石齋楊公謂已推轂
新都為東宮講官而不及公以此為憾石齋頷之未
幾公與當軸者俱逝疏請易名而新都兩斬之云石
田詩板當時已被毀其續集刻無此詩而公書尚有
存者余閱邸報改謚補謚屢奉申飭蓋慎之也謹拈
此段以備采擇而公之詩措意深婉用事渾成識者

自珍其爲天球重寶矣
昔崇禎四年石倉居士學佺
跋

石倉歷代詩選卷四百二十八

欽定四庫全書

石倉歷代詩選卷四百二十九

明 曹學佺 編

明詩次集六十三

儲巖

宿金山聽潮閣

朝遊歡未極暮憩還自營上方鐘磬罷虛室泠然清起
視夜何其片月東南生青山如改顧隱隱攢高城蛟龍

寒尚蟄波浪誰與爭乃知羣動息夕景涵空明歛爾紫
霞想緬貽滄洲情篝燈閉石閣細聽江濤聲

公樂驛

薄暮抵山驛高春辭薊丘青山半銜日重為行人留山
中三日行頗覺懷抱幽鳥鳴白雲澹不省人間憂簡書
復驅出兀兀如拘囚自憎牛馬走真作稻粱謀何人諧
夙尚為我營菟裘

發永濟驛

暮宿山下城朝上山下驛山高雲霧深飯久初見日豈
不畏馳驅欲憩仍復出悄悄閑農心落落用世術川塗
濟無除稅駕何時必賴此寬旅憂千里青未畢

薊州山中

青山借微雨洗沐為誰容宿雲猶未歸更覺岡巒重我
行頗愁寂賴此青山容宛如平生交傾蓋遙相從晚來
境逾勝四顧皆奇峰何由擅一丘且作漁陽農諒無功
業建還以千家封

靈山

靈山慕名勝曦午停征輶倒裝換冠幘徑往凌峇崑手
披茂草開思逐浮雲飄迢迢詣白塔獨立吹清飆迴旋
休縉廬老屋依山椒野僧三四輩衲破形容顛共言山
中貧菽水聊今朝問渠何所戀且得避征徭

涉園

涉園日已晚春去聊追攀微風喜我至習習鳴樹間方
池澹無波中有鳬藻閒雖非沂水曲聊此清塵顏浩歌

彌自慰攜幼徐當還

題蒼雪道人卷

水官失蒼佩龍伯竊上天染成天水碧
眉花競芳妍瀾漫三萬頃彷彿堆雲烟
物情忌太潔白帝不敢前道人茅宇小
骨冷驚高眠出門杳無見乾坤正蒼然
誰開混沌竅坐此清冷淵翩然謝濁世
還我太古年

卽事用韻荅趙叔鳴進士

趙生淮海士睂宇溫而閒宛如九臯禽
獨立秋塘灣竭

來遊京國籍甚名賢關胸中爛文字膏澤曾與顏翹材
館閣地賢俊爭追攀胡為不見擢猶滯郎吏間青雲多
捷徑冠蓋紛區寰誰能澹無事日眺西城山生才必有
用頗笑時人慳幽貞子無厭天道縱好還

白巖扇頭次泉齋韻

黃塵走名都白日觸隆景雲山忽當眼便自出人境脩
然蹇驢翁細路轉岩嶺疎林劃空明一笑得人影我家
柴墟旁南望長引領煙蘿繞茅屋江月閒漁艇栖栖恐

無成題詩聊自省

七月廿有三日雨中同邊李坐李道士西軒

炎歊困朱墨久阻塵外遊及茲風雨辰相與躋崑丘飛
觴狎羽客搦翰逢詩流儼然供宴坐花竹媚涼秋空庭
水盈尺泱泱天光浮寥簾遲夕霽欲去仍為留坐悲芳
草歇况復鳴蟬稠豈無終夕歡感事令人愁層雲蔽蒼
曄誰能詰其由梯空諒有術願就王喬謀

過玄武湖

北山飛翠凝吾杯，舟人舉棹相徘徊。
城隅捩舵踏冰入，船底軋軋聞春雷。
霜風吹衣衣欲裂，湖天泱泱疑飛雪。
司空勸飲夕郎酬，始覺微酣生頰熱。
中流咫尺冰盡開，沙禽水鳥忘驚猜。
新洲昨夜梅花發，暗香偏逐詩人來。
湖波為帶城為被，冊府圖書真得地。
堪笑前朝建此都，只將山水供遊戲。
鍾山龍蟠幾百里，下有龍宮藏劍履。
山中老樹盡成龍，夜夜飛來飲湖水。
湖波直與銀河通，背城一派垂晴虹。
栢梯高寒石梁迥，十洲三島神仙宮。

長堤隱隱湖心路堤上行人日來去春風楊柳夏英集
換盡年華顏色故世間萬事如雲煙湖光山祿只依然
不及湖中魚與鳥涵泳恩波今百年

題吳康齋贈劉濟寧清白字卷

康齋兩字雲垂紙珍重劉宗百金比南窗把卷觸熱看
習習清風吹簟几就中墨汁西江水直寄任城五千里
閨中丈人不復見得見風流老孫子傳家所寶在不貪
阿堵真堪付泥滓長安父老向人說虞部郎官亦如此

君不見漢家西京全盛時五侯七貴門如市繁華回首
併成空籍籍今聞楊伯起

房山

我行京西三百里日望燕臺歌易水春風着眼到房山
不放黃塵吹馬耳煙嵐護雪不肯銷層峰相揖如相招
千金枉購尚書畫何如平地橫生綃晚來頃刻巖姿變
急雨漫山颯銀箭斜陽一抹亂青紅似與詩人供戲勾
胸中丘壑句傳神聞道劉公下筆親太華中峰五千仞

人間何地卜東隣

送程貢士入南監

與君傾盖長安陌
姻婭何須論宿昔
京遊三月苦思歸
白馬湖乾欲龜坼
春官召試彤庭前
晨曦五色搖爐煙
集賢學士看墨卷
青袍鵲立知誰先
姓名且入南籬籍
桂殿秋風吹羽翮
到家喜雨謾留題
洗眼湖光依舊碧

南旺湖次韻

南湖水濶秋無岨
盡日開帆疑不轉
忽從樹杪得高崖

始覺扁舟出天畔
漁家何自住楓蘆
陂寒雁驚遙相呼
斜陽欲下晚風急
人間此景何時無
君不見飲啄那須
論
蔣霍人生得意良不惡

雨夜

激瀉河將渴飄蕭漏未終
雲峰懸宿雨月殿閉遙空
涇渭千流合清涼萬里同
北窓支石枕秋意滿簾櫳

望夕

暑鬱庚重伏陰疑魄正圓
羽蟲明可數螢火暗能然
塵

土開清景光華照暮年浩歌追太白把酒問青天

涿州分司夜坐

簿牒相仍急沈迷眼欲花籠燈猶閱馬廳樹已棲鴉強
半春為客饒多夢到家却嫌塵土浣無地沉倦槎

露坐

曙鼓憎春睡開窗月已西樹高先占鵲城小盡聞鷄露
坐移牀久星言數馬齊何時巾櫛罷攜酒覓芳蹊

登雄縣城樓

高秋愜登眺平楚動悲詞樓櫓何年廢前朝爭戰多雲
閒青海戍塵淨白溝河翻笑咸平際金繒滿塞馳

入順義

眼纈晴初放心旌暮欲懸柳行聊弭蓋沙渡急迴船積
水經荒漠層峰抱遠天柴墟它日夢應到此山川

過牛欄山追次許給事九日韻

不識陽坡路牛山十里遲野陰秋近晦沙軟雨移時石
迸十年菊江涵九日詩憑高懷小杜此地亦堪悲

將至清河睡起

睡醒湖日滿帆影見中流風景猶吾土妻孥共此舟潮
隨殘夜長水接遠天浮野性依然在閒飛羨白鷗

涉濟

河曲風無定船扉掩復開岸花衝絮落沙燕掠波迴詩
思逢春亂鄉心苦病催分流從此去欲渡且徘徊

古城

古城臨水驛燈火望中微雨夜孤舟泊江春遠客歸楚

謠多慷慨漢事惜睽遙指點英雄跡漁樵漫是非

淮上春晦

捲幙涼生恰楚天今麥秋留連淮浦飲悵望秣陵舟樹
密藏村墅湖平見驛樓碧波芳草晚春亦帶離愁

元日雷雨三日雨雪仍雷四日雪

元日何多雨纔春已荐雷史嚴宣父筆詩冷杜陵杯一
飽思坡麥閒吟艷野梅晴光與淑氣應不待人催

春晦連日風雨贈別

風雨彌昏旦韶華暗去來病多空意氣事往半塵埃西
郭園初筍南湖水盡苔今朝覽明鏡更覺老相催

其二

病較芳時晚春含晦日陰曉鐘人不寐舊雨客難尋院
濕蛛絲重庭虛鳥跡深平明添好况移竹滿西林

宿龍江驛有感

舊驛臨江許開門近翠微憶曾乘月宿因得趁潮歸歲
久舫人老天寒使客稀摩娑庭下樹頓覺壯心違

人日雪不止

人夜飄初急，遲明積已深。
王春方少雪，人日不妨陰。
病阻城南步，寒生塞上吟。
晴郊燈月近，願聽屬車音。

懷舊何處觀燈好

何處觀燈好，分曹建業年。
春星低觀闕，晴雪映山川。
鄰曲筵長接，城隅騎每聯。
憶同江水部，終夕咏紅蓮。

良鄉察院夜次壁間韻

徘徊沙苑夕，更喜駟星明。
雜虜猶遮塞，王師未築城。
春

田榛莽迹夜枕鼓聲聲宛種雖神駿何須慕漢京

別劉東之席上次韻

我有連城璧贈君良是輕虛庭振逸駕芳宴列華檠山
水秦中地關河歲暮程休歌渭城柳投老若為情

馮御史執之賈主事璇同遊太明寺

野寺乘春到紫紆一徑賒風聲殘葉亂人影夕陽斜醉
墨懷僧壁誦鐘火帝家馮唐多逸興隨處岸烏紗

其二

騁望攄幽抱茲遊良已遲
岡巒聯楚蜀臺殿閱陳隋
雲物蒼茫外鶯花寂歷時
談兵懷杜牧對酒寫烏絲

驛中會宿別朱亭之用實夫韻

惜別重行行高風落雁聲
野陰朝雨急江靜夜波明
弋水旁通越靈山曲繞城
此邦多故舊送子不勝情

贈周瀛一首仍其喜雨韻

鍾甫後來秀詞林新有聲
詩隨今雨得畫共遠山平
野寺秋光早高居夜氣清
栖遲應不久名在魯諸生

悼光孝寺然僧

老愛屏山律閉參洞室禪幽居惟種竹淨社不名蓮院
日留殘局牀風掩斷編西林耆宿盡懷舊一淒然

次徐傳賞內閣芍藥

風流獨擅玉堂陰手植當年意已深好是菁華融結地
偏承雨露發生心暗香豈待憑欄嗅絕品從教按譜尋
五色詔成長對此清平誰羨謫仙吟

次楊邃菴先生韻

五畝陰陰草蓋亭短牆長送半山青
篝燈夜几先流竹
洗硯秋池墨汚萍賦就每憐司馬渴
客來惟愛次公醒
黃花莫道真幽獨罇有新醪粟有瓶

盧溝西次白巖贈別

別君一日如三月近在京西抵越南
野色催詩連遠樹
東風吹夢隔晴嵐省郎悞許前旌待
驛吏爭馳別騎探
最憶花前攜酒地王程無暇阻高談

金臺

萬里長風動薜蘿眼中燕趙共山河
趣程未辦登高賦問俗猶傳擊筑
謠喬木幾經荒塚盡斜陽偏傍故臺多
黃金不解縱橫困疑有冥鴻避網羅

大城院夜思

渺渺孤城入暮笳坐深游思轉無涯
風高明月還生暈夜久青燈自結花
雁驚登堂愁吏簿驛驛遮路擁奚輶
長安兒女應懸念過盡清明未到家

大房金源諸陵

奉先西下亂山侵澗道迴旋入暮林翁仲半存行殿跡
莓苔盡蝕古碑陰秋山春水風煙換大定明昌德澤深
却是宣和解亡國穹廬黃屋恐非心

其二

長白山高朔漠連金源風致故依然千秋魂魄猶思沛
萬里丘陵却到燕感事重翻江統疏傷心莫問靖康年
幽蘭一燼雄圖歇汝水悠悠入墓田

遊石經山值雨

青嵯碧嶠未曾乾十步真成九屈盤石洞經深猶有字
雪龕僧老不知寒山中猿鶴驚初識雨後峰巒愜細看
徙倚危欄懷靜琬名山何用六經刊

發涑水

重來秋色點平蕪野鳥溪花識故吾北地山川雄涑易
舊家人物擅崔盧紀行自媿詩非史懷古重披郡有圖
莫遣藩牆拋筆研閉門三月賦燕都

入易州

萬山趨海欲東浮曾記高謠醉易州絕塞風雲生遠興
巖城鼓角動清秋樓居豈有仙人在市飲誰從俠客游
六載悠悠華髮換黃金臺上省吳鉤

登繹山

絕頂扶搖百丈梯凜秋風日劇攀躋祖龍此地遺碑在
威鳳何年老樹栖巖竇泉流微作瀑洞天雲構不生泥
南窺禹穴扁舟晚且試霜鐘石上題

遊盤山宿四門塔寺期叔鳴元弼不至

十年幽夢寄盤山積翠浮嵐杳靄間客滯薊門如有待
路緣沙嶺本難扳高秋遠興須登塔清夜閒吟且閉關
欲激泉聲喧枕過暫教塵土洗潺湲

夜坐次壁間韻

躋攀無路倚藤蘿漫許身輕一鳥過風約塞雲臨晚盡
瀑垂崖雪向秋多羣峰矗矗爭騰擲落日瀟瀟動嘯歌
之子不來誰問訊千巖萬壑夜如何

翌日遇叔鳴元弼於山間

歷徧中盤七十峰，水崖雲磴盡行踪。
誰將形勝歸戎落，本為山川畫薊封。
絕頂氣寒連沆瀣，澄潭秋冷臥蛟龍。
黃泥坂下漁陽路，不羨東坡二客從。

石門詠石將軍次壁間韻

精爽千年護石門，晚風黃葉亂山村。
時危暗灑英雄淚，貌古全無斧鑿痕。
故疊夜嘶惟石馬，老兵秋酌只匏尊。
望夫多少山頭婦，不似將軍殿塞垣。

再次盤山峰字韻答恒叔治中

薊門何處得奇峰頗愜平生汗漫踪天作金城寬北顧
神慙玉簡却東封飛流噴薄嵯峨縣竦老樹鱗皴石迸龍
更欲蓬山凌倒景移書東海訪衡從

冬至恭祀東陵

雪後車塵喜不揚羸軀初試北風強行厨快飽沙河飯
出郭猶聞御苑香曾說蹕臨金粟地誰攀龍到白雲鄉
神宮豈為江淮遠萬古茲山鎮朔方

其二

蒲山燈火列齋廬十載王官奉謁初騎省秋來還有賦
文園老去漫多書羶寒尚憶青綾直臺迥頻瞻絳節居
擬和冰廳長至曲昌平道上獨馳驅

其三

鐘聲半夜出明樓陵樹行行石磴幽鵲立且須中使鑰
駿奔初薦太常羞橋山弓劍雲長閉原廟衣冠月自遊
曾是鍾陵陪祀者幾回清夢落南州

邳州月夜

晚來風定水涵空清夜迢迢坐未終幽興自貪湖上月
餘音誰託嶧陽桐帆隨樹影移千里枕滅波聲落兩洪
莫倚黃樓詩版在壯遊非復少年同

郊園閒興

短策輕履路未遙
竭來閒坐伴漁樵
病餘筋骨憐燕驥
歲晚冰霜憶漢貂
水國音塵波渺渺
風林詩思葉蕭蕭
探春欲放江南棹
閒道梅花已著條

季冬月夕次病懷二律

高城寒漏迤宵殘烏鵲南飛夢已安扶老漸須鴈作杖
著書何用鵷為冠中天宮闕遙相望晚景江湖較自寬
洗眼殘年惟此月不眠重為捲簾看

其二

貝闕何須泛海求清光今夕覺遲留十年京國鄉園思
幾處關山鼓角愁對影莫辭花下酒乘流疑是雪溪舟
素娥應笑詩人老不為蒼生也白頭

元旦試筆

桃符題罷一傳觴却笑衰顏借酒光
人日草堂還得句
春風燕寢自凝香
隨陽候雁多成字
獻歲寒梅已作行
滿眼陽和開物象
海隅無地著冰霜

上元夕飲客

愛客曾留臘底觴
晚筵絲竹瀉寒光
淡籠明月饒春麗
小澥輕塵覺雨香
何處風來花作陣
誰家燈好妓成行
開年共說逢佳境
碧盞嘗新有蔗霜

次喬宗伯白巖一律

山腰臺殿倚江清坐久松濤作雨聲寺古碑文多變滅
塔高鈴語半分明神游碧落三山動病阻籃輿五月征
擬待涼秋登絕巘滿川間看白雲生

除夕寫懷

殘臘初春雪滿廳送窮吾亦戒奴星齋中長物韓檠在
身外浮名漢簡青老境看人空守歲年芳入夢喜添丁
翛然淪茗梅花畔且置人間醉與醒

西臺招飲馬上卽事仍次前韻

禁籞西來接御堤，碧波芳草泛晴暉。
春情不逐林花盡，年事頻驚海燕飛。
舊國山川全壯麗，行臺珂馬豈卑微。
宦遊未倦心期在，老大無成敢賦歸。

賀克溫遷居次仲湜太宰韻

長安甲第近何如，却笑承明厭舊廬。
小隱漫求三畝宅，芳隣真擬萬金居。
客來吳下多留榻，官滯周南且著書。
老我荆溪空問舍，過從今已十年餘。

仲湜請老次韻

少年詞賦擬相如
曉入彤墀夜直廬
謝病屢移江表疏
買田魯卜桂陽居
莫驚春晚淹行李
想念時危畏簡書
聞說蒼生占出處
詩成應是倚樓餘

送克溫改官禮部

驛舍離觴送曙暉
宦情鄉思兩依依
春來天上徵求數
衰病江南故舊稀
每愛伐桑題素壁
行看視草列黃扉
同心別有臨歧贈
賸採芳蘭綴客衣

送蔣中允敬之歸省

予告深恩似往年
驂鸞那得羨飛仙
北扉冠佩聊湘浦
中允聲名豈輞川
稱壽酒隨巖桂發
紀行詩待驛梅傳
南歸萬里緣何事
剪綵攜兒拜膝前

靈濟宮席上再次韻贈白巖

使輅今日徧燕雲
西望關山一送君
祠老汾陰空故跡
路經河曲有新聞
趨朝暫綴金閨籍
代祀新頒玉簡文
何處相思詩正劇
數行官柳逗斜曛

張光祿席上分韻賦檜亭

未隨塵土翳蓬蒿
晚着幽亭愜所遭
風細暗聞笙簫發
地偏真得斧斤逃
移根曲阜還同組
分液中山合作醪
歷盡歲寒柯葉在
柴墟松竹與爭高

次東山韻請野亭諸公出游

咫尺登臨且此山
擬尋崧少訪商顏
因人始覺江山勝
作吏惟便歲月閒
禊日尊壘須縱飲
花時車馬欲忘還
詠歸剩有春宵興
正及高城月半環

次韻寄酌檜亭

故人門巷騎曹西嘉樹芳蘭憶舊蹊詩語忽驚年事換
薦章重喜姓名題相思入夢還迷路文字交歡豈病畦
欲試平生看晚節栢臺高處已分棲

德華寓居乃余舊宅感而次韻

聞君移住柳灣前憶我幽棲十二年臨水條桑猶沃若
當軒修竹已蒼然河陽客散傳遺墨綿上人來換舊煙
勘破浮生真傳舍不須華表問飛僊

李貽教席上留別次韻

詩名此日滿儒紳
酒畔重翻楚調頻
歸思暗驚紅樹晚
交情真笑白頭新
飛鴻跡寄千門雪
老驥心馳萬里塵
曾是荆南懷橘客
一杯分我洞庭春

白巖諸公餞于梨雲禪房留別石門分得榮字
乘傳飜慚里巷榮
故園猶及見秋清
驪駒慷慨燕南調
魚鳥侵尋海上盟
刻燭敢忘今夕會
據鞍非復少年行
春明紫禁煙花繞
想共趨朝聽曉鶯

席上次李職方遊弘法寺韻

西林幽事澹相關
遠陌初窮識舊灣
洞裏莓苔疑小有
壁間行草憶高閒
松杉落落臨孤巘
鐘磬泠泠隔九寰
莫訝詩人貧佛日
杏花零落卽春還

白巖貞菴游潭柘寺聯句見憶次韻奉酬二首
石磴迢迢躡遠空
晚來煙月轉空濛
虛疑澗飲隨龍去
且得雲栖與鶴同
潭柘偶然誰作寺
松濤無恙自含風
憑君說向塵埃客
想像題詩莽蒼中

其二

睡穩藤牀出郭遲行行已負白巖期澄潭古寺僧常定
老樹前朝客易悲路遠竟隨明月至山空似與素秋宜
重來擬結騷壇侶莫使山靈笑後時

會飲淨拭行軒

竹邊尊俎意生涼散作清風爽欲狂初月光微猶勝燭
長河影淡不成章偶陪露坐驚離席却笑天遊滯異鄉
知已年來萍梗甚楚江歸路憶微茫

次東園贈舍弟韻奉寄

南村露飲坐秋旻爭席翻憐父老醇把蟹醉時忘左手
飯牛諢閑悟前身夜聞玄鴈初驚歲老共青山不受塵
明日客來還對飲牀頭新漉滿烏巾

次韻答趙叔鳴進士

遺編長對趙東山平地誰能絕頂攀發軔舊曾乘歲壯
篝燈今却愧秋閒一官宿屆風雲際盡日沈迷簿領間
我欲函書投北渚餘波猶得洗頽顏

再答鳳舉兼東叔鳴

誰賦鄉關擬子山少年張緒獨追攀
家臨南甸何愁遠身在東曹却愛閒
登眺且須拋事外聲名今已落人間
歸與亦有柴墟興夢裏梅華正玉顏

雨夜寫懷

空齋積雨迥生愁何處歸雲晚復留
獨鶴不眠長警夜暗蛩多思自鳴秋
十年事與塵俱化萬里心隨水共游
明日清冥期桂魄庾公高興滿南樓

次元善韻奉答見懷之意共得二首

舊京文藻賸才賢轉眼春風已十年載酒動陪雲谷燕
移牀憶就水亭眠別來城郭應無恙老去頭顱底是仙
曾把平生商畧盡不將名托故人傳

其二

誰賦綈衣好此賢枉教他日論當年萬金帚散真難鬻
百尺樓高不借眠落落薊門聊作客飄飄吳市擬成仙
著書莫念頭空白留在名山也自傳

送馬汝勵歸任

長安秋夕使星明乘傳南來見馬卿
春省表隨香案上
夜堂杯向綵衣傾
雄飛萬里身方壯
小却三年政已成
明日驅車仍賦別
都門千樹不勝情

呂邦彥請飲新城道觀追次遜齋先輩謝客見
訪之作

山中春酒縮新茅
仙棹相將汎碧濤
座客盡傾張翰重
主人誰似呂安勞
金尊檀板花前句
海錯江魚竹下庖
曾是鄉賢栖隱地
欲追遺事薦溪毛

送王德輝尚書歸餘姚

南來暫輟紫宸班，弭棹江干便擬還。
東觀圖書頭半白，北堂魚笋夢常關。
歸鴻縱目雲霄外，老鶴鳴陰莽蒼間。
多少玉堂嘉話在，風流應對謝東山。

家君生朝次客韻

敢希潘令賦閒居，正及吾翁八十初。
步屨晚園栽杞菊，舉杯春社飲榆庭。
留愛日逢冬後客，滿佳辰記歲餘。
不向當筵誇矍鑠，自呼蒼鹿駕輕車。

竹居為顧山人賦

山下幽居傍海涯此君偏與隱君宜坐聞清吹詩先得
臥近涼陰俗可醫春雨剩移淇澳種歲寒應長鳳凰枝
藍輿舊有東游約徑造何時載酒隨

寄賀鼎夫新拜寺丞

自笑青驄老不勝趣裝何意問金陵板輿對鏡能將母
棘寺臨湖不負丞暇日罇罍應屢設近城樓閣喜重登
遲君欲結他年社只恐行臺早見徵

倣古意

粉壁紗窗隔樹看，儂家門戶近長干。
錦機文字縈心苦，青鏡鉛華駐景難。
滿地梨雲供夜寂，一簾蕉雨閉春寒。
吳舫見說歸來穩，水長橫塘昨夜寬。

賀方嘉伯發解赴南宮

芳年縹馬步蘭皋，任俠猶嫌楚客豪。
平地煙霄差恨晚，南山秋色敢爭高。
九華殿曉香浮研，五色雲晴日照袍。
弧矢從來四方志，馳驅應不賦賢勞。

訪張養中值其出飲不遇次壁韻留題

野色含煙淡欲收
溪光著樹暖初浮
酒狂自笑陳驚坐
詩好難逢趙倚樓
塵榻謾留開墨卷
晚山貪看上簾鉤
興來不似山陰盡
驅馬還期到水頭

挽傅處士體齋叔父

慘淡哀詞滿素縑
楚江秋淚省中添
蘊真自喜開陶徑
投老何曾築傅巖
每爲山行吟獨放
慣從泥飲坐能淹
百年風致今陳跡
惟有寒花繞舊簷

與況山人郊行口占所見三首

閉門三日雨斷送春歸去西郭少人行草深迷渡處
麥阪斷人行驅馬荒田裏隔岸聞鳴榔魚舟在深水
古城如頽垣知是何年築野草燒痕多牛羊不來牧

趨朝寓目

疎鐘隱隱出彤墀坐候明星起却遲內苑墻高楊柳暗
東方猶似未明時

李宗一使山東題荷驚橫披為贈

紅蕖白羽汎空明
浙浙新涼六月生
咫尺滄洲千里隔
雲飛水宿總關情

題畫

沙浦波明碧樹攢
杏花疎雨澹生寒
京城帶卻江南夢
試問吳船借畫看

雨霽書所見

雲峰矗矗嵌秋空
九疊屏風較未工
惟得霎時風雨橫
楚山移在月明中

口號與嘉伯覓竹

何處清風洗俗腸眼中無地覓瀟湘玉山也有簣簞谷
試借西園一畝涼

潤守王誠之以假山石見貽奉謝一首

一劄重煩恠石供開窗已覺翠浮空數峰尚帶江南雨
彷彿金焦入眼中

元章拜石圖

虎賁猶似對中郎末世那知老子狂才到宣和流落盡

眼中誰是丈人行

漁樂樵隱二圖為吳隱君題

鷗波濯足柳維舟
閱盡滄江到白頭
偶與野人相話及
夜來閒夢入西周

黃帽青鞋懶折腰
擬隨麋鹿住山椒
少年操斧曾傷手
只傍風林拾墮樵

次韻謝武靖伯惠茉莉茶二首

采采江南茉莉花
移根多在列侯家
清時幕府渾無事

羽扇綸巾自煮茶

茉莉香浮碧椀新
檜旗猶帶建安春
何人更汲中冷水
來餉松廳病暑人

張道士山房

不到青林十五年
長松垂鬣鶴成仙
江東舊事憑誰話
坐盡銅盤一穗煙

芳樹青青二月時
林扉衝雨記裁詩
紅塵消盡長安客
留得雲房老煉師

寺中再次敬修詠竹

翠葆青筠晚興長
佳衫袖不曾霜
數枝絕似湖州筆
欲改僧居喚墨莊

七日寶應有懷

湖雨吹風洗暮煙
渚禽驚浪逗行船
舊時酒伴飄零盡
莫恠春愁到客邊

古城驛

野水微茫斷岸平
幾家相對掩柴荆
不須候吏沙頭報

驛站懸知是古城

北風

一路輕寒二月中
水南桃李不曾紅
恁來河朔春光晚
吹過花時尚北風

容城道中

三月一日天氣佳
燕南春風着面來
渡頭楊柳不堪折
忽憶故園花盡開

出雄縣南門

河隄一曲柳成行千里塵霾隔此鄉魚櫓不鳴沙鳥靜
村扉半掩水風涼

霸州北門

輶車春盡却南還病眼凝塵澁遠天爭似益津門外柳
暖風晴日趁三眠

小憩次壁間韻

忙裏題詩一送春雨閒風日愛晴勻他年定有方城夢
萬柳廳前閱馬人

黃村

梨花半落柳初綿
客路題詩憶閬仙
莫道長安春已盡
歸人猶在暮鐘前

察院望西山

臥聽松風坐看雲
十年忘却在塵氛
柴墟恐有移文誚
只借房山作隱君

階前甘菊

繞砌遲遲待我來
暗香幽意自徘徊
從教院僻無人到

也向秋風最後開

銀冶嶺

山迴水曲自成溪
城市初來路欲迷
西崦人家尋不見
衡門應傍翠微栖

桃山小憩

山下幽祠借午涼
野人為我置藤床
官程却憶園居好
黃鳥綠陰清晝長

君子口人家

三間茆屋十弓耕了却官租任此生聞道薊門憔悴甚
麥田都屬五軍營

寶坻道中

黃渡坎西仍渡河行行官樹夕陽多客程莫怨黃昏近
明月滿空流素波

泗亭清明

京陌音塵故國情心旌長觸夢魂醒杏花楊柳紛紛雨
惆悵清明在泗亭

舊縣驛前人家

桃花掩映野人家住久依山老屋斜
惟得只從牆外看行人車蓋滿風沙

淮堰

秋風淅淅動簾旌淮堰還稽半日程
鄉思轉多眠不得海潮催得月東生

石倉歷代詩選卷四百二十九

欽定四庫全書

石倉歷代詩選卷四百三十

明 曹學佺 編

明詩次集六十四

費宏

送吳克溫南歸

都人望春信
頑陰尚凝寒
白日慘無光
汙泥幾時乾
有客束書卷
倉忙出長安
問之笑不答
但云報恩難
無由

繫馬足把袂徒相看浮雲亦易散離筵勿辛酸今朝且
痛飲別後仍加飧

其二

池頭五彩鳳刷羽恒自詫醴泉始肯飲腐鼠胡能跨不
效燕雀羣相隨入朱厦兒童恆其然彎弓共彈射山中
有高梧棲老亦閒暇朝陽光景新覽德省復下

臘八日省牲

臘神方遇八長至屢踰九郊禋重省視臣職在奔走軒

車薄暮出落日正當酉歸鴉自南來陣陣集官柳城闌
鑰未合閤吏謹迎候月弦此初上仰認是何宿彷彿胃
昂間如弓適盈殼騎隊間篝燈平沙快馳驟天門俯而
人咫尺卽牲園犧人報名物有兔實居首次鹿次牛羊
牢豕處其後旋歸不淹晷北向見珠斗寒更人欲定鐘
鼓應清漏刮面苦寒風侵凌透羔袖還家對妻子附火
索杯酒却憶去年冬燕齊半強寇桑園抵任丘掠焚遭
毒手都邑頻戒嚴郊垌謹戍守蒼黃從變禮奉命當白

晝兒童亦駭愕此事昔無有感格極寅恭猶能徹高厚
如今幸寧謐一笑可開口杞人固多憂睂宇尚雙皺至
治有馨香非登亦非豆皇祖著明訓心存聽斯懋神靈
配上帝陟降常左右文孫可無念成命我膺受懇悃竟
何裨窮蒼庶陰誘轉移諒非難肩祚保長久

題蜀江圖

懋君示我蜀川圖萬里江山纔一握紙尾親題出魏公
云是潼川李生作岷山隱隱插雲端山下寒江經禹鑿

神施鬼設露端倪陰合陽開分脉絡嵯峨雪嶺隔蓬婆
嫋娜繩橋橫滴博溪流芳膩花曾浣江色澄鮮錦初濯
娥睂淡掃月輪高灩澦孤撐秋水落白盃赤甲形模異
龍脊虎鬚聲勢惡影疑百越看山鷗鳴愛九霄聞聚鶴
羣仙戲集自逍遙神女夢思猶綽約登龍飛鳳入青霄
白馬黃牛出丹壑瞿唐峽口束奔湍脚底雷霆常噴薄
青螺忽湧白銀盤湖裏君山誰剗削披圖不覺塵眸醒
奇徑可疑還可愕如朝帝闕擁圭璋如赴戎行攢劍槊

又如鐘磬在高懸如設丹梯登峻閣九屏疊秀卽匡廬
二室窮深更嵩洛就中地勝每因人終古流芳真聲聲
杜從夔府稱詩聖程向涪中傳易學獨醒亭畔誦騷辭
八陣磧邊懷將畧圖窮尚有岳陽樓志士登臨非取樂
我嘗有意賦遠遊苦被浮名自纏縛因圖寓目亦欣然
更寫此詩存大畧重來借我細臨模畫史何人解盤薄

過靈濟宮

匹馬春遊困馳逐解鞍暫憩西城足巍然雙表逼雲霄

閨苑蓬萊驚在目試窺洞府瞰仙宮
碧瓦朱甍光可燭簷牙高啄總塗金
殿趾重鋪皆砌玉雕牆畫壁擁周遭
椀萼為泥間青綠諸天相去僅尺五
寸草化身成丈六塵途彷彿遇羣真
世界依稀藏一粟龜趺屹屹載穹碑
指眼含辛三四讀乃云二闕在清都能
與蒼生造冥福誰知無益只勞民
骨間推髓心剜肉神輸鬼運諒未難
即使為之應夜哭憶昔鳩工庀材日
健卒頽肩車折軸是時秦晉正饑苦
不雨經時巫可暴爺娘食子夫食妻

米石寧論錢一斛地下真應有劫灰人間忍見生妖木
星搖石語皆緣此下土狂夫謂神酷誰能因鬼見上帝
流涕長吁一披腹移取寸椽并片瓦已堪覆庇逃亡屋
百金可惜臺可無薄已憂民除秘祝歸來偶讀漢文紀
稽首吾君繼芳躅

送永平蔣通判

綠煙侵坐草抽芽紅雨沾衣杏著花使君拜命班春去
壯哉行色人矜誇公家愛民不如馬馬在償勞斃償價

郡人專待福星來
摸拜道旁迎別駕
君今養馬先養人
須知馬耗由民貧
他年布野如雲錦
會有旌章下紫宸

題廣東陳氏雪景圖

生綃一幅中堂垂
眼前雪景何清竒
懸崖絕壁光彩發
老樹幻出瓊瑤枝
雲際柴門半欲掩
似是白日將西時
披氈戴笠者誰子
衝泥傍險相追隨
一人前行仰關進
蹇驢失脚雙撐持
僕夫荷杖藥瓢舉
以袖護頂行遲遲
一人騎馬過橋去
橋危溪惡馬力疲
二人騎驢各袖手

聳肩覓句寒如痴鬢髻指關向翁語須慎險峻毋遨嬉
中有一人跨牛背牛行不動如舟移最後二人從二奚
青驪白馬光陸離囊中琴絃凍且折志在山水誰相知
吾聞嶺南天氣煖羣龐見雪嗥如馳從來此景不易得
固知畫者勞心思坐令炎瘴盡消息清氣散入詩人脾
馬學士先生有詩賀伯父致仕用韻奉答

奎光夜向金陵見學士聲華勞聖眷江南草木亦知名
不獨文人求識面祠臣自古號仙官留都更與仙官便

禁鼓何妨朝卧穩
名山一任春遊徧
樂極惟愁兒輩覺
賦成不托鄉人薦
長安見日未忘情
杞國憂天時動念
詩諫應陳創締難
筆誅肯代奸諛傳
冷語冰人殊不畏
執官炙手誰能羨
先生有似東坡老
峨嵋也近西充縣
奇才昔感先皇知
久次宜聯浴堂殿
帶看腰下始生花
玉在璞中羞自衒
我嗟蒿倚失長松
史局相望却生怨
代言自合應時須
蓮炬重來還燄燄
試看花驥發誰遲
暮刷不教驚足先
廬州別駕亦小坡
便親少慰看雲願

家庭倡和有新詩寄我時封兩三段

壽恐菴章公八十一

公謝方石
先生姻友

鴈蕩山高且廣翠滿台南如湧浪山翁築隱選佳勝
暮靄朝霏千萬丈流泉到枕醒塵夢爽氣浮窗愜眞賞
居家有政惟孝友化俗無爭盡謙讓山間舊結神仙侶
酒琖詩筒日還往就中意氣誰最親方石先生本姻丈
恐菴心事已高賢鉅筆形容更精當先生請老今桃溪
白髮黃髯兩高尚望海亭中坐幾回不妨斫地歌聲放

小春南閣門弧懸一篇定值千金貺二郎歸賀索荒詞
却媿乍鳴真兄長靈運平生縱遊處萬壑千流結遐想
何由一造先生門亦欲從翁操几杖

題冒車駕東臯唱和卷

海水西頭誰結屋時時東望醒塵目蒼涼初日掛扶桑
持書步出東齋讀何許醒風薦地來眼中蜚氣成樓臺
紛紅駭綠忽如市亂我衷曲增煩哀宿昔好仙術尋常
夢蓬萊珠宮貝闕容我住詎似濁世多浮埃東臯斗絕

幾千仞笑口到此還時開
竭來待續遠遊賦羽翰未就
心悠哉

井井亭

為吳南夫編修乃尊作亭在蘇之
天平山而井即白雲泉之支派也

一亭穩著吳山巔
行人舉首皆欣然
喉乾吻燥足力倦
井幹列坐斟寒泉
含冰漱玉失道暵
五漿之饋誰爭先
銀瓶素綆無罌礙
鷗夷謾向征車懸
問誰好事此修築
往來盡道封君賢
吳中此水稱第一
分支遠自層雲邊
荒基斷甃紛在眼
昔人遺惠仍流傳
泥汗不復飛鳥下

石罅但有鳴蛙專百年義舉崇朝復心存經濟真拳拳
惜哉未免行道惻一勺小試山中權德豐報厚天可必
詞林有子方孤鶩淵澄井冽負公望克舉遺訓常周旋
雲膚冰氣互蒸滲從龍行且升于天天瓢傾注慰高仰
沛為霖雨醴為川吾詩不忘如左券貞珉可向亭中鐫
為三府安公題所藏史痴翁圖

雨收雲淡東風軟疊疊林巒青似染翠藹晴嵐撲面來
遊人選勝開春宴小小亭臺載酒過深深樓觀題詩徧

芳樹交加百鳥鳴清溪掩映千花豔誰摹此景筆頗奇
無限風光歸匹練使君胸次若藏春愛此尋常舒復卷
畫惟寫意不須工境若會心非在遠陽和有脚望循行
寒谷吹噓待鄒衍

右春景

萬壑千崖堆玉塵老松僵立霜皮皴行人飛鳥不見影
漁簑揭揭趨江濱荒村酒薄魚可換徑須一醉寧知貧
詩人徃徃歌畫此不誇錦帳羅釀醇使君愛詩復愛畫

行吟坐對皆天真
高堂六月苦炎熱
披圖便覺融心神
清飈拂座送涼冷
寒岫照眼增嶙峋
欲憑一問茅簷下
或有扁門高卧人

右雪景

柳絮

舟中不記春將暮
忽見風中有飛絮
巧能投隙入青簾
媚欲依人沾白紵
漫空舞雪真顛狂
天地明遠春茫茫
瓊樓玉宇最高處
因風作態隨飄揚
毬鋪球轉俱無益

雀啄魚吹供戲劇兒童欲捉到手難始終憑藉東風力
柳花飛盡春江頭春光欲去不可留汙池但有青萍合
煙景淒迷柳線柔

贈程侃

武夷之山信奇絕幢節森羅屏障列清溪九曲繞山流
膏黛澄凝羅帶摺神仙煉藥湏名山遺蛻往往留山間
洞門石扇瞰幽壑丹梯百丈誰能攀我家去山纔咫尺
屢閱圖經常嘆息何時一葉泛扁舟歷覽煙霞訪仙迹

生今從仕閩闕頭茲山應得時時遊沿流擊楫棹謳發
可藉勝境消閒愁山中聞說多瑤草採服令人却衰老
若得紅顏生羽翰世上浮沈何足道

送張鳳翔歸番禺

南海三年別東風萬里歸夢隨池草變行逐嶺雲飛宿
處繁猶短喏邊筆屢揮遺珠吾不惜轉眼試春衣

暮春卽事

小艇看山罷歸來日已昏機舂趁晚急漁火集灘喧聽

樹知秋意觀星認帝垣緣江諳小徑步履到柴門

看雨

春深纔得雨晏坐忽寬憂紅見宮花潤青知隴麥抽
澗纔賡轍鮒晴漫喚林鳩欲動清宵酌簷聲恐遂收

卽事

扶棟初成屋為圍旋築牆看山嫌樹密傍砌覺花香
蝶翅明如畫鶯聲巧似簧春光不相負何必滯他鄉

觀漲

雲氣吞山盡江流帶雨渾
喜晴臨野岸觀漲驗沙痕
拘束無官府追思有弟兄
孤舟橫渡口歸憩欲黃昏

雨中理菊書示星士徐東井

久雨門難出荒庭日易晡
竹繁教略洗花穉欲頻扶
迂拙真何用幽閒且自娛
過從有佳客無酒亦須沽

憶至樂樓花竹

樓景專林壑春歸客未歸
幾多巢鷺長無數楹花飛
筍尚侵堦出梅應得雨肥
祗須催釀秫到日賞芳菲

其二

草閣依清樾牙籤挿架齊平生有閒癖未老得幽棲題
竹詩堪賦聽鶯酒可攜從人爭鳳沼我正憶龍溪

雨霽

雨霽郊原潤春深景物妍暖雲低覆樹流水漫成川徑
草碧如剪檻花紅欲燃呼童理耕稼生計在農田

聽雨

聽雨門常閉看雲枕自欹閒愁喧燕語浪喜颺蛛絲潤

氣侵書帙浮埃滿硯池連朝親藥裏無興復吟詩

遊山庄偶書庄後有泉出石竅四時不絕欲名

石泉別墅

長夏渾無事山庄漫一遊柴門迎犬吠樵徑突歸牛雲
物清溪淺風光碧樹稠石泉尤可愛滴滴繞階流

禪祭謁陵和匏菴方石二先生贈行韻

錦樹芳塵送晚颺長途酒琖未容辭豪吟自覺貂難續
奉引真慚馬濫騎山翠空濛多雨後川光瀲灩欲冰時

五雲深處頻回首前輩多情有贈詩

送陸庶子令弟下第南還用吳匏菴韻

退鷁南飛趁晚風休將形迹論窮通
玉還荆國猶堪寶瑟向齊門豈未工
捧日自應懷冀北看雲誰復憶江東
陸家兄弟今猶古預識他年事業同

贈王古直

一別霞城知幾年故人多住鳳樓前
懷歸每笑依劉客乘興還登憶戴船
老去無財非病也閒來有酒卽欣然

詩能自古窮如此看取吟囊滿壁懸

送興化王太守分得封字

一麾遠守閩中郡何日重聞闕下鐘
本為睢陽聊屈黯應知渤海卽還龔
春庭草色埋三木夜卷書聲藹四封
儒吏名家真不忝士民私幸屬鉤銘

雪中次東坡韻

凍合寒林噪暮鴉川無遊艇陸無車
幻成海國蓬山景飛盡天門瑞木花
獨擁漁簑思釣叟淺斟羔酒屬豪家

梁園誰受相如簡
短賦初成手幾叉

次韻答婁誠善先生見贈

春來深慕浴沂賢
野外尋芳羈玉鞭
細柳拂衣濃帶露
好山迎客淡生煙
多慚青史曾無補
一卧滄江已有年
心事傍人渾未解
謾誇題柱筆如椽

陪都憲簡公宿叶岩寺因次其舊題韻

春風拂面散輕陰
信宿禪房會此心
客思祇應孤鴈得
交情大勝碧潭深
雲根穿水孤能立
宰木凌霜老更禁

撫景相看多感慨浩歌隨意輒成音

次丘公韻題周璘秀才書屋

林泉樂事屬專門
殷屋濤聲午枕喧
身似虛舟寧有患
事如春夢了無痕
池隨晴雨頻消長
山與雲煙自吐吞
已結漁樵成逸侶
石床頻坐亦微溫

苦雨

今年春雨疑天漏
十日都無一日晴
遊處每勞持具出
夢回常厭打窓聲
照泥猶自愁星點
仰瓦何當罪月行

眞宰憐民應上訴
須留餘瀝佐秋成

九日贈人韻

重陽叢菊雨中開
籬下行吟日幾迴
老圃秋香人獨醉
夕山佳氣鳥飛來
登高舊許君能賦
闢穢應偕客舉杯
聞道南陽泉石好
何時載酒更徘徊

和馬侍讀秋雨吟

客邊今雨坐誰同
獨倚秋軒詠晚風
池鏡淺涵雲影白
簷綰低映菊花紅
更籌亂耳憑鷄報
霜信侵衣有鴈通

偏側寂憐南北巷悶懷全露短箋中

經筵遇雨衣盡濕時方大雩喜而有作三月二

十二日

講殿今年此日開小閣宣喚衆官來春衣冒雨何須惜
早隴祈天正可哀雲護綵屏龍蜿蜒風縈香鼎鶴氈毳
微臣一字曾無補也向官筵醉飽回

又用韻寄奉伯父大人

拂衣還入海鷗羣野趣傍人未許分霜後踈籬開晚菊

雨餘深洞駐閒雲
新篳白酒時時醉
別院清香細細焚
老眼天留看勝事
芝蘭庭下藹奇芬

和趙侍御煎茶韻呈巡按陳崇之

憑探窮籠出先春
敲臼仍呼隔竹人
火擬丹燒分進退
泉將符調別新陳
對花任殺風前景
當樂能醒醉後神
客至莫愁疲捧盃
生平清味最相親

過儀真呂水部祖邦以詩送別用韻答之

旅泊誰嫌度堰遲
舊交真樂勝新知
曹經何遜曾遊處

詩逼唐人最盛時信有瑤琚報桃李祇將顛顚對姜姬
無由得遂雲龍願笥篋當開慰所思

送大參胡大聲

一函千里賀龍飛佩取重金下玉墀夕飲每當冰合處
冬行却喜雪飄時扁舟祇載桐江月匹馬還尋峴首碑
便道庭趨應不忝家傳清德畏人知

送楊太守恭甫之常州府

青年美譽動班行蚤出郎曹綰郡章柳拂熊車春問俗

簾垂燕寢晝凝香
誅求最緩幽農苦撫字
誰知漢吏良
極目秋空鴻雁度
天書早晚卽徵黃

送都給事王文哲奉命祭告南海便道歸東莞

省親

百神受職逢新主
萬里乘槎到海濱
事異碧鷄煩漢使
祠臨黃木見唐碑
鰲波翠湧春流外
烏綠紅看曉沐時
幾度瞻雲今最便
諫垣驚訝綴班遲

題名山草亭送戶部侍郎王公民望致仕歸華

容和守溪韻

城南歸路踏平蕪望入明山興不孤
籬菊開遲應待玉沙鷗
瞻穩亦忘吾風流可續睢陽會
煙景誰爭賀鑑湖
聖主恩深廊廟遠先憂一念未應無

寄致仕司空李公時雍次韻

風潭百頃木千章老向林泉喜欲狂
湍急不妨鷗泛穩
花殘應笑蝶飛忙
獨醒慙斷杯中物無病閒抄肘後方
猶有願豐心未了每逢隣叟問耕桑

徐殿讀舜和宿慶壽寺中用前韻戲簡

容膝齋廬翠壓低筆床茶竈也堪攜為隣恨不仍居左
樂國何緣却怨西僧供每分敲韻鉢佛燈堪伴校書藜
懷人咫尺成千里迎蹕還期馬首齊

初謁秦陵

春夜西陵拜謁初恍如前日候宮車堯仁未拭蒼生淚
舜孝何慚太史書寂寂雲峰扶饗殿娟娟月澗遶齋廬
如聞鐵馬常沾汗憑藉威靈尚有餘

予旣以詩贈邦振北潭學士謂其四弟亦欲一
詩乃和前韻贈之

昆季文章總大方風潭佳處有書堂眼中帽影愁坡隴
夢裏鴻聲度野塘北海神鷗看速化南山霧豹且深藏
歸來夏課應忙甚黃八槐花樹幾行

送楊太常正夫歸蜀省其尊翁少保留耕先生
次太宰邃菴楊公韻

咫尺天顏許暫違臣忠子孝本同歸瑞虹亭舊開華宴

濯錦江清舞彩衣喜信遠憑雙鵲報鄉心先逐白雲飛
門迎笑語真堪盡老大全勝玉帶圍

其二

此行人羨是登仙蜀道從來似上天漢代家聲推石奮
王家世譽數僧虔夢依北極常千里詩補南陔可一篇
所至蒼生煩問喘歸來宣室豈虛延

和子和弟冬至謁長陵

漢廟衣冠拂舊埃節祠常遣百官來雲間玉座依稀見

月下金鋪次第開，疊嶂嵐浮青擁髻。
古松陰重綠生苔，文謨武烈真無愧。
萬里燕臺接鳳臺。

奉答西涯翁二首

翁所寄贈用去歲吳甯菴邀入荆溪避暑韻未復及其嘗

欲買田陽羨而未遂之意

襟度休休發興長，衣痕在眼自淋浪。
望依北斗天垣近，坐愛東村夜色涼。
霜竹種成凡幾箇，早梅吟罷有餘香。
遠遊莫憶當年賦，大老惟因住帝鄉。

其二

路入荆溪興愈長
釣遊隨處是滄浪
春藏別塢花迎客
暑隔孤亭竹送涼
蜀阜有碑當健筆
蘇園無橘噉殘香
西歸每作扁舟夢
恨不從公老此鄉

午睡覺回文一首

明窓一枕午濤春
適意閒來睡眼慵
清瀾茗芽春焙細
便床筠簟夏敷重
城高過雨聞疎點
野濶垂雲接遠峰
行逕遶池秋向曉
鳴蟬幾樹綠陰濃

再和閒齋韻

空谷高人獨掩扉一時山水盡含暉
遺榮賸得幽棲樂
做古猶嫌勝會稀
飲可稱仙不知醉
詩如有癖欲忘機
深杯對酒頻燒燭
坐上輕寒透袷衣

其二

手栽花竹繞山扉
坐閱朝陽更夕暉
架上古書經眼熟
世間塵務到心稀
菜蕢不入騷人室
杞菊能充晏歲飢
只恐林泉難久戀
好賢還為賦緇衣

謝見素林公撰至樂樓記用其舊見寄韻

草閣難招花外車，但從落日見樵漁。
庭心有橘誰為頌，墻角多蕉可學書。
農事未諳猶硯食，仙丹須煉且樓居。
山房乞取坡翁記，奎壁光華夜有餘。

田園雜興回文用弋陽令楊雲鳳韻

苔垣寫徧幾行斜，癖句多愁鳥與花。
梅雲路殘銷屐蠟，竹風吟罷岸巾紗。
灰燃夜鼎翻湯蟹，日射晨窗綴室蝸。
開眼醉餘詩興遣，雷喧過耳厭聲華。

其二

遊春晚興適西莊硯滌深池墨漬香麝野雜花間倚杖
竹園分笋嫩盈筐疇平徧插秧叢綠雨苦嫌多水潦黃
幽靜每談農甚樂悠懷遠慕上歌唐

閒中和見素舊寄韻

安步真應可當車不妨蹤跡混耕漁風前細撚花枝嗅
霜後閒將柿葉書陶叟白蓮難入社杜陵赤甲可遷居
欲消長日惟詩酒飲興吟情頗有餘

南郊分獻似得東字

牲帛分方禮數同石壇高峙帝丘東人傳碧海無波久
我覺神仙有路通老栢陰深低印月祥煙繚繞遠隨風
頻年趨走承恩地感極深慚賦未工

喜雪用禁體二十韻

同雲初黯黯凍雨忽纖纖歷亂先投瓦霏微巧入簾不
緣風自舞時有霰相兼貪賞衣從濕矜奇手自拈當垆
偏厚積洒壁每虛黏負暄懸朱闥輕盈壓畫簷竹俄封
翠節松忽變蒼髯四埜疑無路羣峰未沒尖兒癡愁遽

止老怯恐無厭淪茗資清苦侵床減黑甜履穿妨近步
臺迥眩遐瞻縱得幽人愛還遭俗子嫌窮閭皆罷市達
衛竟遭拔聳處肩將合談時口似籛腐儒良獨喜豐稔
此能占麥必連雲秀蝗今入地潛袁門甘暫閉墨突異
常黔挾冊光堪映論詩禁最嚴苦啗毫屢禿劇飲酒須
添白戰慚前輩餘膏亦可沾

送徐舜和使高麗十六韻

聖澤霑殊域賢勞屬近臣卷書辭翠幄持節出丹宸恩

餞來浮蟻宮袍賜瑞麟赤心知報國素志不謀身四牡
遵塗急三韓引領頻華夷元共主符命此更新驛路千
山曉王正萬里春鰲橋成幻語鴨綠是通津舉國郊迎
日諸曹伴館長龍鬚專晏席鵲舞樂嘉賓賦手看前輩
詞峰讐遠人端卿名久著原父博無倫首夏應旋旆同
官每望塵神功煩紀錄帝學待敷陳

屋舟為潤人錢宗玉作

身世悠悠水上萍高人棲泊傍岩扃浮生甫里從無宅

擇勝坡翁別有亭意匠經營殊雀舫心機忘盡對鷗汀
推篷小酌江天碧下矴遙連海嶼青豈必侵星遊別渚
不妨撐月吸波冷蠟帆隱隱當窓起魚艇飄飄倚檻停
雨洒春波簷欲沒潮回秋浦酒初醒危檣颭浪吾何恐
擊櫂成謳客喜聽京洛塵纓思一濯長風借便可揚舲
得邸報有異聞感而有作

百年異事駭初聞反袂開緘老眼昏太史豈應侵諫職
寒儒自欲報君恩驪龍領逆難遭睡虎豹關嚴枉叫閤

但使有光爭日月不慚無力正乾坤妖墓寸鉄心何苦
駿馬千金骨僅存烈士殉名元可喪佞人多巧舌空捫
唐科詎愧劉蕡策楚些湏招屈子魂事定蓋棺真不朽
聲緣憂國竟湏吞干將在獄猶衝斗砥柱當流少遏奔
文運盛衰關世運長歌寫罷不堪論

送閣老熊峰石公祭告泰山闕里

一函香帛出彤墀東祀親煩閣老齋七十二君封禪地
百千萬世帝王師新朝望秩遵虞典故國牲牢憶漢祠

祝冊御名勞自署華原使傳已先馳
頌聲遠播懷柔後
道化字昭感格時登望杜陵遊甚壯
低回遷史去何遲
秦碑細剔莓苔字
周檜徐攀雨露枝
秘跡未緣窺玉牒
遺音如或聽金絲
長途記述詩偏富
盛禮遭逢興亦奇
青簡裁成湏大手
鑿坡翹首數歸期

柴埠津

一聲兩聲牛背笛
三隻四隻漁人舴
江村風景描難就
倚杖閒行古渡頭

箱房後叢竹抽簡甚多內直房候朝與司徒孫
公談種竹事公誦其在吏部郎署詠竹因次
其韻

新竹春來日漸添清陰翠色滿疎簾此君每見難拋却
不覺孤亭日轉簷

睡起

習閒成懶百無功塵事難侵世累空睡起呼童向籬落
菊花枝上捉青蟲

木亭發後用前韻寄之

目隨帆影入雲中路出湖山東復東無限風光供指點
冰為溪水玉為峰

其二

吟社同推老作家珍函題處字如鴉一尊未盡淹留興
秋晚方看菊有花

其三

剝後還教碩果存陽和漸次滿乾坤何曾老諍真堪嘯

漫有

關

到子孫

石倉歷代詩選卷四百三十